

# Служба священномученику Владимиру Амбарцумову

22 октября 2016 г. 01:42

Текст службы священномученику Владимиру Амбарцумову утвержден на заседании Священного Синода от 21 октября 2016 года (журнал № 96).

## *Служба священномученику Владимиру Амбарцумову*

Месяца октября в 23-й день  
Священномученика Владимира, пресвитера Московского

На велицей вечерни  
На Господи, возвах: стихиры, глас 2.

Подобен: Егда от Древа:

Егда Божественныя ревности/ сердце твое исполни Господь,/ священномучениче преславне,/ тогда всем житием твоим/ евангельстей проповеди послужити потщался еси,/ и ничтоже возможе тя от Христа отвратити,/ ни скорбь, ни теснота, ни гонения,/ богоблаженне Владимире.

Егда светом веры истинныя/ озари тя Господь,/ мучениче всечестне,/ тогда, вся житейская во уметы вменив,/ священства дар приял еси/ и, в тесноте и гладе пребывая,/ правило благочестия чадом твоим яви,/ богомудре Владимире.

Егда любовь совершенную/ в души твоей уведи Господь,/ священниче достохвальне,/ тогда к исповеданию веры Православныя/ и подвигу мученическому тя призва,/ ибо и смерть не возможе разлучити тя/ от любве Божия, яже о Христе Иисусе./ Темже ныне прославляем тя,/ богоизбранне Владимире.

Слава, глас 4:

Приидите, вернии, лик составим/ и воспоем новаго священномученика,/ всем сердцем Бога возлюбившаго/ и заповеди евангельския добре исполнившаго./ Что бо обрящем в завете его?/ Или что наследим от имения его?/ Не мягки ризы, но броню правды,/ меч глагола Божия и щит веры Православныя./ Сия вся оружия и нам подаждь,/ священномучениче Владимире,/ и молитвами твоими сонаследницы Христу соделай,/ подающему тобою нам велию милость.

И ныне, Богородичен: Иже Тебе ради Богоотец пророк Давид:

Вход. Прокимен дне. И чтения 3 священномученику.

На литии стихиры, глас 4:

О, славный Православия поборниче,/ священномучениче Владимире,/ с любовию припадающе к тебе,/ прославляем твоя подвиги и молимся:/ моли прилежно за нас Господа,/ во еже спастися душам нашим.

Просветися житие твое добродетельными светлостями,/ имиже, верныя просветив,/ тьму нечестия разгнал еси./ Темже, сын света благодатию Духа Святаго быв,/ вселился еси, идеже Свет невечерний сияет,/ священномучениче Владимире./ Мы же, светоносное твое прославление совершающе,/ любовью тя почитаем.

**Слава, глас 6:**

Помяни, Господи, иже о Тебе пострадавшего,/ новаго страсотерпца Владимира,/ мужественно Тя исповедавшего/ и муки многоразличныя претерпевшаго,/ и прими его моления о спасении нашем.

**И ныне, глас тойже:**

О, Благодатная и Пречистая Дево Марие,/ Ходатаице и Заступнице всех верных,/ предстательством теплаго молитвенника,/ священномученика Владимира,/ сохрани и защити землю Русскую.

**На стиховне стихиры, глас 5.**

**Подобен: Радуйся, Живоносный Кресте:**

Радуйся, священномучениче Владимире,/ крестителю Руси тезоименне,/ радуйся, красный благовестниче,/ имже мнози глаголы вечныя услышаша/ и надежду спасения уллучиша,/ радуйся, **пастырю**, житием и смертию/ донныне вере научаяй нас./ Моли спастися душам нашим.

Радуйся, священномучениче Владимире,/ верою патриархом древним **подобный!**/ Радуйся, пророче неведущим Бога,/ радуйся, Духа Святаго обителе!/ Ты бо в пустыни безбожия/ всякий возраст ко Христу приводил еси/ и, яко друг Женихов,/ Тому страданьи последовал еси,/ моли спастися душам нашим.

Радуйся, священномучениче Владимире,/ образ Христов нам являяй,/ радуйся, кимвале доброгласный любви Божественныя,/ еяже ради крещением Христовым крестился еси/ и чашу Того испити сподобился еси./ Радуйся, трапезы Небесныя общниче/ и сопричастниче новомучеников и исповедников земли нашея,/ Престолу Христову предстоящих,/ моли спастися душам нашим.

**Слава, глас 8:**

Вера твоя вменися в правду, избранниче Божий,/ и упование паче упования во страданиях обрел еси,/ любовью Христовою созидаемь./ Темже и ныне, у престола Пресвятыя Троицы предстоя,/ моли спастися душам нашим.

**И ныне, Богородичен: Безневестная Дево:**

**Тропарь, глас 3:**

**От юности Бога усердно взыскавый,/ истину в Церкви Православней обрел еси/ и, крест пастырскаго служения ревностно подъемый,/ верныя во дни гонений добре окормлял еси./ Темже и прещений безбожных не убоявся,/ даже до крове пострадал еси,/ отче священномучениче Владимире,/ моли Милостиваго Бога спастися душам нашим.**

**На утрени**

**По 1-м стихословии седален, глас 1:**

Духом Евангелия просветился еси/ и любовью Божественною,/ еюже познаются Христови ученицы,/ чадом своим и ближним послужил еси,/ со Христом взывая:/ аще кто хочет быти первым, да будет всем слуга.

**Слава, и ныне, Богородичен:**

Благовестия гласом,/ Безвестная Дево Мати Христа Бога, позналася еси./ Тому послуживши чистым житием Твоим, Пресвятая,/ от всех родов прославляешия достойно.

**По 2-м стихословии седален, глас 5:**

Деяний мужей апостольских последователь явился еси,/ Христа ревностно проповедуя,/ и духом на всяцем месте моляся,/ рукама своима работая,/ скитаяся и беды терпя,/ ныне на Небесех воздаяние праведных/ приемлещи достойно.

**Слава, и ныне, Богородичен:**

Величает весь мир Тя, Мати Божия,/ ангельстии силы славословят,/ пророцы радостне ликуют,/ апостоли благоговейне поклоняются,/ мученицы и праведницы воспевают Тя дерзновенно.

**По полиелеи седален, глас 1:**

Мучениче святе Владимире,/ от юности Христа возлюбив,/ житием нескверным возраст старости и мудрость приобрел еси,/ и чада твоя, злобою младенствовати научая,/ яко дети ко Христу привел еси.

**Слава, и ныне, Богородичен:**

Дево Богоизбранная Отроковице,/ ведуще Тя яко Матерь Божию/ и Заступницу рода нашего,/ со умилением непрестанно взываем Ти:/ Владычице Премилостивая, не остави чада Твоя.

**Таже степенна, 1-й антифон 4-го гласа. Прокимен, глас 4: Честна пред Господем/ смерть преподобных Его. Стих: Что воздам Господеву о всех, яже воздаде ми. Всякое дыхание: Евангелие от Луки, зачало 67.**

**По 50-м псалме стихира, глас 6:**

Верую жив, праведниче, был еси,/ делах любви и милосердия сию укрепляя,/ священномучениче Владимире,/ алчущим бо и крова лишенным потребная подавал еси/ и в гонении непреклонен пребыл еси./ Сего ради бесов полки победил еси/ и уста безбожных заградил еси, **якоже некогда Даниил уста львов:**/ моли спастися душам нашим.

**Канон Богородице, со ирмосом на 6 и священномученику на 8, глас 2.**

**Песнь 1**

**Ирмос:** *Грядите, людие,/ поим песнь Христу Богу/, раздельшему море и наставльшему люди,/ яже изведе из работы египетския,/ яко прославися.*

Грядите, людие,/ поим песнь Христу Богу,/ раздельшему неведения нашего море/ и наставльшему ны пети святаго мученика Своего Владимира,/ в немже прославися.

Ревности Моисеовы/ исполнен быв, отче Владимире,/ в пустыни безбожия веру умножил еси/ и достигл еси обетованныя земли,/ Православныя Церкве.

Тя, священномучениче Владимире, заповеди Господни присно храняща,/ полчища супостат не устрашиша,/ темже во ограду Церкве Православныя вшед,/ достигл еси Земли Обетованныя.

**Богородичен:** Ковчеже святой и Скиние Божественная,/ путевождствуи и нас ныне в Горний Иерусалим,/ присно от Бога отпадающия,/ да наследницы будем Земли Обетованная.

### Песнь 3

**Ирмос:** *На камени мя веры утвердив,/ разширил еси уста моя на враги моя,/ возвесели бо ся дух мой, вегда пети:/ несть свят, якоже Бог наш/ и несть праведен паче Тебе, Господи.*

**Верую** укрепляемь, праведне,/ не затворил еси уста твоя, пришедшей године безбожия,/ но паче разширил еси я, проповедуя Христа,/ и, якоже Ной праведный, верую обличил еси нечестивыя.

**Темницы** и врачебницы посещая,/ Христа Авраамлим страннолюбием приял еси,/ и якоже онаго, изведе тя Господь в Землю Обетованую, во еже пети:/ несть праведен паче Тебе, Господи.

**Проповедь** твоя возсия во отечестве нашем,/ егда мнози законнии Церкви сынове впадоша в нечестие,/ ты же благословение Иаковле веры ради наследовал еси,/ темже с новомученики зываеши:/ несть свят, паче Тебе, Господи.

**Богородичен:** Призри на ны, окамененныя сердцем и умом, Пресвятая Дево,/ и моли Сына Твоего,/ да и мы чада Авраамля будем/ и в вере утвердимся предстательством Твоим, зывающе:/ несть праведен паче Тебе, Господи.

### Седален, глас 1:

**Не** достанет нам времени, повествующим о вере твоей,/ юже явил еси кроме Церкви, отче Владимире,/ но послушествован сею быв,/ достигл еси Небеснаго Иерусалима,/ на Начальника веры Иисуса взирая,/ и крестным подвигом, якоже лестницею,/ возшел еси к Церкви написанных на Небесех,/ идеже молишися,/ да и мы с тобою совершенство приимем.

### Слава, и ныне, Богородичен:

**Не** достанет нам времени воспети чудеса Твоя, Владычице,/ не достанет словес прославити таинства, бывшая на Тебе,/ паче же дерзновения не имамы, во гресех суще/ и во осуждение уста своя отверзающе,/ но Ты сия очисти, Чистейшая ангел.

### Песнь 4

**Ирмос:** *Услышах, Господи, слух Твой и убояхся,/ разумех дела Твоя и дивихся и возотих:/ слава силе Твоей, Господи.*

**Услышав** Господа, призывающаго тя,/ по слову Его вся сущая в мире оставив,/ на крест возшел еси.

**Нозе** во благовествование веры обув/ и от силы в силу восходя,/ священства **благодатию облеклся еси**,/ таже и мученическим венцем увенчался еси.

**Молитвы** делание возлюбившаго,/ службы святыя совершителя тя постави Господь,/ Емуже, и в темницу ввержен, присно воспевал еси:/ слава силе Твоей, Господи.

**Богородичен:** **Слух** Господень услышавшия/ и дела Господня уразумевшия укрепи, Пресвятая Дево,/ и сподоби силою Сына Твоего/ дела Божия творити.

### Песнь 5

**Ирмос:** Света Подателю/ и веков Творче, Господи,/ во свете Твоих повелений настави нас,/ разве бо Тебе инаго бога не знаем.

Света исполнено бысть/ священное служение твое,/ темже во свете заповедей Христовых/ верныя люди ходити поучал еси,/ мудрыми словесы вразумляя.

Любовию отрока сиротствующа всыновив, святе,/ и духовная чада, якоже родная прием,/ ныне мученическим дерзновением/ и нас духовныя сродники своя соделай.

Повелением Господним усердно последуя,/ чадом твоим милостивый отец явился еси/ и, яко добрый пастырь, тех, любовию назидая,/ Христу привел еси.

**Богородичен:** Угаси раздоры церковныя, Христе,/ молитвами Матере Твоея/ и настави ны, не человеком угождати, но Тебе, Владыко,/ разве бо Тебе инаго бога не знаем.

### Песнь 6

**Ирмос:** Ко Господу от кита Иона возопи:/ Ты мя возведи из глубины ада, молюся,/ да яко Избавителю во гласе хваления,/ истины же духом пожру Тебе.

Благочестное погребение жены твоея/ человека некоего к вере приведе,/ мученическая же смерть твоя/ многия из глубины мертвых дел возставляет.

Во едионадесятом часе призван,/ труды ревностныя и кончину мученическую Христу принесл еси,/ темже полученный динарий подаждь нам, молимся,/ якоже всегда требующим творил еси.

Провидящи жена твоя гонения, возвести тебе смерть за Христа, священномучениче,/ ты же, словесы сими укреплен,/ мученический венец мужественне восприял еси.

**Богородичен:** Духом и истиною Богу поклоняющеся,/ воспеваем Тя, Мати Божия,/ яко истинно Слово Отчее рождшую/ и молящуюся о спасении рода христианскаго.

### Кондак, глас 7:

**Оружием правды облеченный,/ страдания за веру мужески приял еси/ и, яко истинный воин Христов,/ мучителем противостал еси, глаголя:/ временно есть господство ваше./ Мы же вопием ти:/ радуйся, священномучениче Владимире,/ во Царствии Небеснем венцем нетленным от Бога увенчанный.**

### Икос:

Верую странствия на земли приял еси,/ Отечества истиннаго взыскуя,/ темже Бог уготова ти Небесный град;/ верую поношение Христово в богатство вменив,/ египет мысленный оставил еси,/ темже Бог на гору Боговидения тя возведе;/ верую кровь свою проливал еси,/ на мздовоздаяние взирая,/ темже пальмовыя ветви в руке прием./ Мы же ныне вопием ти:/ радуйся, священномучениче Владимире,/ во Царствии Небеснем венцем нетленным от Бога увенчанный.

### Песнь 7

**Ирмос:** *Образу златому на поле Деире служиму,/ трие Твои отроцы небрегоша безбожнаго веления./ Посреде же огня ввержени, орошаеми пояху:/ благословен еси, Боже отец наших.*

Безвестно, яко агня незлобивое пострадав, священномучениче Владимире,/ ныне, в белых одеждах на Небесех Агнцу предстоя, поеши:/ благословение и честь и слава Тебе во веки.

Небрегл еси безбожных веления, яко отроцы в Вавилоне,/ темже по смерти ангел вознесе душу твою в Небесныя обители,/ идеже со старцы и ангелы покланяешия Престолу Владычню.

В рове земнем скрыти беззаконие свое мняху убийцы,/ ангели же душу твою к жертвеннику Божию вознесоша,/ отонудуже тщету мучителей свидетельствуеши, вопия:/ благословен еси, Боже отец наших.

**Богородичен:** *Образу златому не покланяющихся/ ороси милостию Твоею, Богородице,/ Нива бо Ты еси неоранная,/ орошенная же Духом Святым/ и прозябшая Единого от Троицы, Бога отец наших.*

### Песнь 8

**Ирмос:** *В пещь огненную ко отроком еврейским снизшедшаго/ и пламень в росу преложшаго Бога/ пойте, дела, яко Господа/ и превозносите во вся веки.*

Власть мучителеву, яко временную обличив,/ в темницу ввержен был еси,/ юже ти Господь росой Духа в храм претвори./ Ныне же пред Престолом Божиим служиши Ему во веки.

Добромудр быв, **егда разделения церковныя прилучишася,**/ Христу Единому верно послужил еси/ и чада своя в послушании Тому сохранил еси./ Темже Седящий на Престоле обитает в тебе во веки.

Божие промышление безропотно приял еси/ и, скитаяся и лишения терпя,/ ближним служения не оставил еси, отче Владимире./ Темже по слову Господню радости неизреченныя насыщаешися.

**Богородичен:** *Огненные печи и тьмы геенския избави нас, Владычице,/ но милостива к нам буди,/ да Тя, яко Богородицу и Матерь Света, в песнях возвеличим.*

### Песнь 9

**Ирмос:** *Безначальна Родителя Сын, Бог и Господь,/ воплощся от Девы нам явися,/ омраченныя просветити, собрати расточенныя,/ тем Всепетую Богородицу величаем.*

Земным отцем **священным писаниям** научен,/ от Отца Небеснаго печать Духа Святаго приял еси/ и, Сыну Божию последовав,/ дары Небесныя подвигом мученическим оправдал еси.

Гонения, предреченная ти, приял еси от безбожных/ и, слову евангельскому следуя,/ многия скорби и мучения претерпел еси,/ сего ради ныне ликуеши во Обителех Отчих.

Богу ныне предстоя,/ просвети ны, грехми многими омраченныя,/ воздвигни от сна греховнаго/ и научи ны воспевати Троицу Единосущную и Нераздельную.

**Богородичен:** *Имамы в бездне мучитися, омраченнии страстьми,/ аще не Ты, Дево, умолиши Сына Твоего,/ да помилует нас,/ тем Всепетую Богородицу, Тя величаем.*

### Светилен:

Днесь светлый облак свидетелей Божиих призвавше,/ вся новомученики Церкви Русския прославим,/ да облистает нас Солнце Правды, Христос Бог наш,/ молитвами священномученика Владимира,/ иже купно с ними Престолу Божию предстоит/ и Света Невечерняго наслаждается.

### Слава, и ныне, Богородичен:

Днесь, Богомати,/ сиянием Твоих образов ограждаеши и осеняеши нас./ Мы же благодарне вопием Ти:/ радуйся Заступнице усердная,/ грешных Споручнице и всех скорбящих Радосте.

### На хвалитех стихиры на 4, глас 1.

#### Подобен: Всехвальнии мученицы:

О, всехвальне священномучениче!/ Ты мучительми в землю люте ввержен был еси,/ но ангели на Небо душу твою прияша,/ отонудуже всем любящим тя,/ яко звезда пресветлая сияеши,/ и память твою днесь светло совершающих/ в Небесныя обители путевождствуеши.

О, всехвальне священномучениче!/ Ты, славы земная бегая,/ красная мира сего отвергл еси/ и на путь скорбей и страданий/ мужественне возшел еси./ Сего ради мученик Господень нареклся еси/ и, в лице святых ныне водворяясь,/ молишися о спасении душ наших.

О, всехвальне священномучениче!/ Тебе чистыми сердцем и усты/ похваление приносить подобает,/ ты же, немощь душевную нашу/ и скудость словесную ведая,/ приими с любовью днесь пение сие/ и, Престолу Божию предстоя,/ моли спастися душам нашим.

### Слава, глас 2:

Сотника веру, и во Израили неведомую, показав,/ от люторския веры в Православие прешел еси/ и, сторичный плод Христу принеся,/ во Царствии Небеснем со Авраамом возлегл еси./ Темже с ним Господа моли,/ да избавит нас тьмы кромешныя/ и спасет души наша.

### И ныне, глас тойже:

Все упование мое на Тя возлагаю,/ Мати Божия,// сохрани мя под кровом Твоим.

### На Литургии служба вся священномученику

#### Молитва

О, священномучениче Владимире, избранный учениче и последователю Христов! От юности твоея Бога усердно взыскав, веру истинную обрел еси и, словом евангельским, яко светильником, весь путь жития твоего озарив, в темную годину гонений крест пастырский небоязненно подъял еси и, верным наставник, окормитель и утешитель быв, смерть за веру претерпел еси. Темже молися и ныне Владыце Христу, православныя христианы от разделений соблюсти, священники и монашествующия в подвизе укрепить, отроки от пагубных и бесовских наветов сохранить и вся верныя в Православии утвердить и сию веру святую непреложну нам соблюсти, да прославим купно с тобою на Небесех Отца и Сына и Святаго Духа, ныне и присно и во веки веков.

**Аминь.**

